

太華希夷志序

帝八

愚除晉寧河中府之幕職審過華山給聞希夷先生遺事公務之暇采古書所錄或訪語之談其高風峻節信乎前宋一代之異人也故作太華希夷志以紀之先生明易深造玄妙之理視人之禍福物之休咎其應有如著龜當五代之時有撥亂濟世之志所學得皇王帝伯之道聞宋太祖登極知天下已定遂入華山為道士徵召不至及太宗即位三宣至闕下待以賓禮賜坐與語所論事之凶吉靡不徵驗欲拜官堅辭弗受不久放還山跡雖方外之士脗合中庸之道其脫落塵世泥滓軒冕傲睨公侯視萬乘若僚友恬退高隱不尚勢利足抑奔競之流可追配巢由嚴陵之節其崇名教厚風俗以助萬一云回顧吮癰舐痔奴顏婢膝昏暮扣人之門戶驕人於白日者猶醬瓿之醜雞奚足論哉輅遠居保郡官除蒲川為家貧不免二千里來之任初兩任教官連任縣職館閣名公鉅儒累舉詞翰之選當路齟齬不果用僕恥於奔競故碌碌

碌居州縣之職以代耕未能展平生讀書之志恒鬱鬱不遂因閱古傳記感希夷先生之高節編次成一書俾新學之士激勵其志內有差訛鄙俗傳者之誤志其固陋就撰以補綴之以寓高遠之趣庶幾有取焉延祐甲寅秋七月己未日訥齋張輅序

正一天師清微弟子 洪百堅 製作
道教學術資訊網

太華希夷志卷上

登任河中府知事訥齋張輅集補撰

先生名搏字國南亳州真源人幼歲戲渴水一作青衣媪抱置懷中乳之曰令汝更無嗜欲聽悟過人及長習舉業後唐長興中試進士不第隱居武當山九室巖辟穀鍊氣二十餘年或傳夜靜焚香讀易有五老人至厖眉皓髮容貌古怪常來聽誦居日久搏問之老人對曰吾儕即茲山日月池龍也此間玄武據臨之地華山是先生棲隱之所也異日希夷默坐五龍忽詣令先生閉目陵空馭風終宵至華山置坐於盤石之上開目視之不見五老人去向或云睡法即龍教也龍善睡故云多閉門不出獨坐至百餘日不起周世宗召至闕下令於禁中扃戶以試之月餘始開熟寢如故始異之因問以黃白之術搏曰陛下為天下君當以蒼生為念宜宜留意於此乎世宗不悅放還山賜號白雲先生令長史歲時存問先生負經濟才初五代間自晉漢之際每聞一朝革命輒望感